

求  
顥  
齊  
弟  
子  
記

求闕齋弟子記卷四

東湖王定安譏

平寇一

咸豐二年十二月

詔丁憂在籍禮部侍郎曾國藩幫辦湖南團練 初道光末年  
廣西歲洩飢羣盜嘯聚山谷間攻掠村堡守令不能治隱匿或  
不以聞大府微覺之而亦竊幸其不遽發上下務爲掩飾姑息  
益益無所忌亂民響應日益衆其尤著者陳亞葵歐祖潤顏品  
瑤大頭楊山猪箭等大股數千人小股三四百人他無名草竊  
者不可勝數時鄭祖琛爲廣西巡撫

朝廷屢促督兵捕盜三十年六月祖琛駐師平樂府而洪秀全  
始倡亂於桂平縣金田村秀全廣東花縣人略識字演卜爲業  
先是奸民朱九濤倡上帝會秀全偕同邑馮雲山往師之以其  
術游廣西居桂平武宣之交地曰鵬化山往來潯州藤縣象州  
陸川博白間桂平人曾玉珩者家饒於貲延秀全課其子武宣  
人蕭朝貴者秀全妹婿也亦家桂平遂與楊秀清石達開等互  
相比附師事秀全秀清廣東高要人居桂平之平隘山達開貴  
縣人二人者尤譎詐秀全私引重之秀全嘗謬死七日復甦詭  
云將有大劫拜上帝者可免不拜則蛇虎傷人拜上帝者不得  
拜別神託名西洋耶蘇教造眞言寶誥諸僞書謂天父爲耶火

華以耶蘇爲長子秀全爲次子鄉里農氓多信之入會納銀五  
兩爲香鑑費凡從教者男曰兄弟婦曰姊妹無長幼尊卑之別  
楊秀清因秀全詐稱天父事遂證其說自作巫謂天父降附其  
身詞人陰私摘發之羣驚爲神嘗託天父令秀全跪受杖已有  
不睦亦伏地令人杖之不少貸衆皆篤信貴縣秦日綱亦起而  
相應分布各道誘聚漸衆浸淫而有金田村之禍金田村在桂  
平平南之交村人韋昌輝者原正名故充保正納粟入監與秀全  
等相結號四十兄弟恣爲刦剽時各邑紳士團練自衛訴昌輝  
罪狀於平南縣知縣王烈未敢問乃控潯州府知府顧元燈檄  
桂平縣緝治知縣倪濤捕昌輝下獄旣而釋之潯州協副將李

殿元聞昌輝出獄或言倪濤受賂四百金殿元心黯之率兵數十人赴金田捕昌輝濤不得已亦率巡檢張鏞繼往會於金田村韋家祠堂濤訊責昌輝結盟諸劣狀昌輝以賂故負氣抵牾濤怒笞昌輝四百昌輝不勝其憤暗囑其黨以竹竿插門首爲誌嚮晚鳴鑼放火李殿元倪濤聞變皆逃去惟張鏞未能行匿輿中天嚮明衆見官軍退惟輿在以矛刺輿窗傷鏞鏞故加六品銜旣死衆視帽綴六品頂戴知其官也益日夜謀不軌於是韋昌輝楊秀清石達開秦日綱等皆會於金田而洪秀全方隱匿平南縣花洲山人村胡以曉家昌輝秀清等率衆迎之至金田旋移營武宣東鄉招集拜上帝會者又赴象州聚納亡命貴

縣林鳳祥揭陽羅大綱衡山洪大全等率衆從之遂部署隊伍  
製旗械踞金田爲巢穴事聞

詔以固原提督向榮爲廣西提督九月榮至桂林時慶遠思恩  
南甯等府皆有賊向榮率兵往討秀全乘閒益猖獗

詔以林則徐爲欽差大臣赴廣西督師會則徐薨於途而前  
雲南提督張必祿亦奉

命赴粵剿賊至潯州卒

詔以李星沅爲欽差大臣十月星沅至桂林時鄭祖琛爲給  
事中袁甲三參劾革職

詔以周天爵署廣西巡撫咸豐元年洪秀全僭僞王號於大黃

江犯桂平貴縣武宣平南等縣入象州境二月廣州副都統烏  
蘭泰奉

命幫辦廣西軍務三月烏蘭泰至廣西與向榮會剿疊有斬獲  
烏蘭泰性忠直喜猛戰向榮諳習敵情喜持重二人者皆有名  
而志趣不同遂失歡四月大學士賽尙阿奉

命赴粵視師始出都

上賞過必隆刀以壯其行是月李星沅卒於武宣軍五月烏蘭  
泰向榮敗賊於象州六月賽尙阿至桂林烏蘭泰與提督秦定  
三敗賊於新墟時洪秀全據紫荆山以新墟爲門戶雙髻山豬  
子峽爲輔頰七月向榮烏蘭泰秦定三等攻奪豬子峽遂克雙

髻山向榮欲乘勝擣花雷茶地賊巢都統巴清德以五不可阻之遲五日始進兵八月賊於鳳門坳口築壘我軍分三路進攻賊乃退向榮由桂平追之烏蘭泰秦定三等由鵬化山追之烏軍阻於山內向軍遇賊因雨致挫賊由大黃墟分水陸兩路趨大黎犯永安州閏八月初一日陷之遂僭僞國號爲太平天國洪秀全爲僞天王楊秀清爲僞東王蕭朝貴爲僞西王馮雲山爲僞南王韋昌輝爲僞北王石達開爲僞翼王洪大全爲僞天德王秦日綱羅亞旺范連德胡以曉等各稱丞相軍師等僞職時廣西初起殷匪誅滅殆盡陳亞葵爲署桂平縣知縣李孟羣擒獲顏品瑞爲布政使勞崇光梟誅其他二十餘股皆平惟洪

秀全等獨存然已凶肆不可制十一月向榮等圍攻永安屢捷十二月賽尙阿親駐永安督師咸豐二年二月十七日賊潰圍出十八日烏蘭泰邀擊於山間殺賊二百餘人生擒洪大全會大雨軍無宿處餒甚向榮烏蘭泰謀整軍再入漏五下烏蘭泰忽率親兵入山向榮急前接應賊合隊復戰山逕攀礎路瀝泥不能行賊乘我軍未陣冒死衝突總兵長瑞長壽董先甲邵鶴齡皆死之賊繞山路竄至六塘墟距桂林僅六十里烏蘭泰追至霰受礮子傷旋薨我軍收復永安州城丁守存聯芳等檣送洪大全至京師磔於市三月洪秀全犯桂林向榮率親兵介馬疾馳先一時入城會同巡撫鄒鳴鶴藩司吳鼎昌副將馬龍開

等晝夜守禦相持三十日賊解圍北去四月洪秀全陷全州順流下趨長沙浙江知縣江忠源督湘勇堵於蓑衣渡忠源湖南新甯縣舉人補秀水令時丁憂回籍賽尙阿檄在湘募勇赴粵烏蘭泰甚器之遂贊其軍幕旋以病歸聞賊圍桂林省城急募勇馳援既至奮兵擊賊再破之賊解圍遯忠源躡賊全州慮賊乘湘水漲劫船東下三數日可至長沙急扼蓑衣渡伐木爲堰拒賊部署甫定賊果劫民舟數千蔽江下忠源力擊之鏖戰兩晝夜斃賊千餘僞南王馮雲山中礮死於是賊舍舟竄至永州阻水乃東趨道州五月陷之六月疊犯江華甯遠嘉禾等縣陷桂陽州七月賊乘桂陽趨郴州陷之忠源會諸軍壁其三門

相持月餘僞西王蕭朝貴詒長沙城外民房未毀守兵單冀可  
襲而取也獨卒死黨由永興茶陵醴陵趨長沙二十八日薄城  
而軍總兵和春常祿李瑞德亮與江忠源倍道追之亦抵長沙  
蕭朝貴踞城南及小西門民房爲窟占妙高峯鰲山廟等高阜  
爲壘巡撫駱秉章提督鮑起豹幫辦防堵羅繞典會同紳士黃  
冕唐際盛等登陴固守八月新授湖南巡撫張亮基自雲南來  
鉏城入延湘陰舉人左宗棠入幕贊畫軍事堵禦益力僞西王  
蕭朝貴攻南門官兵擊之殪時洪秀全楊秀清尙踞郴州聞朝  
貴死悉黨馳至分屯西岸廣築土壘蔓延於湘江之水陸洲向  
榮率張國樑等踵至營西岸嶽麓山秦定三和春營於東自天

心悶迤遷至新開鋪皆官軍堅壘軍威頗壯賊以郴桂所得煤  
夫穴地攻城九月二十九日南月城西魁星橋側地雷發城裂  
四丈餘羣賊蜂擁而上參將張協中搶護中槍死之副將鄧紹  
良大呼躍出城闕手刃數賊右膊被礮子穿透屹立不動弁兵  
齊下斃賊四百餘名賊始敗退卽將城闕堵合十月初一日城  
外金雞橋地雷再發和春江忠源堵之十八日魁星橋地雷又  
發副將瞿騰龍力扼殺悍賊數百賊之地道已盡復缺油鹽洪  
秀全恐衆志漸離乃造僞玉璽稱爲天賜脅衆呼萬歲十九日  
夜從浮橋渡湘水由回龍塘竄去故分小股向南行我軍謂賊  
犯湘潭傳令東岸軍南向賊大股已竄甯鄉矣先是廣西被圍

上震怒逮問賽尙阿

授兩廣總督徐廣縉爲欽差大臣賊圍長沙久廣縉擁重兵駐湘潭不肯進十月賊竄益陽擄民船數千出臨資口渡洞庭湖抵岳州提督博勒恭武先三日棄城走賊旣陷岳州郡城舊有逆藩吳三桂軍械礮位盡爲賊所得復奪民舟五千餘留四日遂東下十一月初九日賊犯漢陽十二日陷之漢陽郡城之對岸曰漢口鎮富庶甲於天下百貨山積被焚五晝夜殆盡武昌與漢陽僅隔一江冬令水涸江中漲巨洲賊以所擄船作浮橋鐵索環之自漢陽直達武昌省城四圍立壘分門攻撲時總督程矞采駐軍衡州巡撫常大淵居守向榮追賊至鄂營於東

門外洪山連戰皆捷隔賊壘與省兵不能合十二月初二日黎  
明向榮自洪山出隊連燬賊壘數十座槍礮斃斃千驅溺於武  
勝門外之沙河亦數千尸骸枕藉此時官兵距城不過三里屢  
遣差弁約城兵接應城中軍士亦奮激請背城一戰大湻不從  
向軍孤立故無功賊未至時大湻縱火燬城外民房以防穴地  
文昌門濱江賊穴地丈餘或白大湻宜內穴灌水以應之大湻  
又不從初四日地雷忽發城遂陷大湻死之同時殉難者學政  
馮培元布政使梁星源按察使瑞元漢黃德道王壽同丁憂鹽  
道王東槐署鹽道林恩熙武昌府知府明善武黃同知周祖銜  
江夏縣知縣繡麟紳民婦女懸梁赴水死者數十萬人死喪之

卷之二十一  
忠源公集  
參爲二百年所未見賊旣陷武漢大湖以南土匪蜂起江忠源以楚勇二千駐守省城瀏陽會匪周國瑜謀亂聚衆萬人號曰徵義堂忠源討平之而他邑伏莽皆竄焉思動

詔諭湖南巡撫張亮基起公幫辦團練並搜查土匪事宜先是公於六月

簡放江西正考官七月行次安徽太湖縣聞母江太夫人訃奔喪回籍八月值賊圍長沙閒道回湘鄉自以奉諱歸家不宜與聞軍事草疏懇請終制方發使就道適庶吉士郭嵩燾至力勸公出公弟國荃亦贊之於是始治兵於長沙因疏言團練之難不難於操習武藝而難於捐集貲費小民倚財爲命卽苦口勸

諭猶遲疑而不應若經理非人更譁然而滋擾非比嘉慶川楚之役官給練費不盡取之民也臣擬訪求公正紳耆董理其事俾百姓知自衛之樂而不復以捐貲爲苦庶幾有團練之實效無擾累之流弊至搜查土匪一節前月撫臣張亮基嚴飭州縣查拏土匪痞棍令州縣力能捕者自捕之力不能者專丁送信至撫署設法勦辦現在屢破巨案業有成效臣查長沙重地兵力單薄擬於省城立一大團就各縣曾經訓練之鄉民擇其壯健樸實者招募來省練一人收一人之益練一月有一月之效自軍興以來二年有餘糜餉不爲不多調兵不爲不衆往往見賊逃潰從後尾追皆以大礮鳥鎗遠遠轟擊未聞有短兵相接

以槍鉅與之交鋒者今欲改絃更張宜以練兵爲要務臣現擬訓練章程參仿前明戚繼光近人傳鼐成法但求其精不求其多但求有濟不求速效誠能實力操練於士匪足資勦捕卽省城防守不無裨益

硃批報可於是命羅澤南王鑫等領湘勇三營逐日操演湘軍之興自此始  自洪秀全陷武昌徐廣縉革職逮問

詔以張亮基署湖廣總督潘鐸署湖南巡撫骆秉章署湖北巡撫

授向榮爲  欽差大臣

命前大學士琦善爲  欽差大臣偕直隸提督陳金綬內閣學

士勝保由河南進剿防賊北竄又

命兩江總督陸建瀛爲欽差大臣督兵進防江皖張亮基旣奉總督湖北之

命乃調江忠源隨行時巴陵土匪晏仲武作亂餘黨未清忠源留數日平之

咸豐三年正月公行保甲法於長沙令知州黃廷瓊知縣曹光漢司其事又設立發審局令知州劉建德等司之一時巨姦大憝多被誅戮盜賊屏息莠民多改而從善遠近大驩遺劉長佑李輔朝王金搜剿常甯耒陽土匪賊聞風驚潰遣羅澤南討衡山土匪破之洪秀全悉衆東竄向榮收復武昌賊俘男婦

約五十萬人船萬餘隻初二日棄城東行帆檣如雲蔽江而下  
陸路賊分兩岸夾江以行所過黃州武昌蘄水蘄州均被殘掠  
至廣濟之武穴鎮適兩江總督陸建瀛率松江兵二千數百名  
駛至龍坪命總兵恩長爲翼長至老鼠峽與建瀛前設防兵三  
千名會剿舟師未及登岸賊已驟至恩長戰歿舟師潰建瀛退  
保金陵賊遂薄九江而下十七日洪秀全陷安慶安徽巡撫  
蔣文慶等死之二月洪秀全陷金陵改江甯府爲僞天京初  
陸建瀛遣廣艇及兩江舢舨防東西梁山遇賊不戰而退賊  
至金陵城外築壘二十四座逆船自新洲大勝關綿亘至七里  
洲初十日儀鳳門地雷發賊衆驟登第二雷又發賊自斃千餘

而另股已由三山門越城而入將軍祥厚副都統霍隆武卒滿  
兵防守內城相持兩日內城亦陷祥厚陸建瀛霍隆武死之同  
時殉難者提督福珠隆阿前廣西巡撫鄒鳴鶴前浙江副將湯  
貽汾上元縣知縣劉同樞秀全既得金陵與僞東王楊秀清謀  
立僞都秀全欲往河南有湖南年老舟人大聲言曰河南水少  
而無糧敵困不能救金陵有長江之險城高池深民富食足尙  
不立都而往河南何也楊秀清聽其言遂改金陵爲僞天京遺  
僞丞相林鳳祥羅大綱李開芳曾立昌等分攻鑄江揚州等府  
皆陷之秀清輔僞政創立僞法男與女不得交談母子不得並  
言賊兵擅入民房者斬無赦出城者不許擔挑號令皆秉秀清

僞天王洪秀全守僞府而已。向榮追師至金陵駐朝陽門外孝陵衛屏蔽蘇浙號江南大營。

詔授江忠源爲湖北按察使。

飭赴江南大營幫辦軍務會湖北崇通兩邑土匪大起公遣軍與忠源會剿平之時永桂以上會匪充斥亂者紛起每警報至公酌量緩急分營往捕議定卽傳檄促行遣左右料簡軍發火藥軍行無踰兩日者所至捕斬首惡搜查餘黨數日而定鄉里晏然因疏言今粵匪全數東下各縣鄉團專以查拏土匪爲主湖南會匪之多人所共知去年粵逆入楚凡入添弟會者大半附之而去然尙有餘孽未盡此外又有所謂串子會紅黑會半

邊錢會一殷香會名目繁多往往成羣結黨嘯聚山谷如東南之衡永郴桂西南之寶慶靖州萬山叢薄尤爲匪徒明育之區蓋緣近年有司亦深知會匪之不可遏特不欲其禍自我而發相與掩飾彌縫以苟且一日之安積數十年應辦不辦之案任其延宕積數十年應殺不殺之人任其橫行遂以釀成目今之巨寇今鄉里無賴之徒囂然不靖平居造作謠言煽惑人心白日搶劫毫無忌憚若非嚴刑峻法痛加誅戮必無以折其不逞之志而銷其逆亂之萌臣之愚見欲純用重典以鋤強暴但願良民有安生之日卽臣身得殘忍嚴酷之名亦不敢辭

硃批勉之 三月潘鐸因病乞罷

詔駱秉章仍署湖南巡撫 公檄湘鄉知縣朱孫詒討安化串  
子會平之 廣匪陷桂東縣公檄張榮組往剿駱秉章遣道員  
夏廷樾率湘勇七百人繼之桂東平 是月向榮擊賊於金陵  
通濟門大捷我軍大營十八座移偏城垣 四月江忠源師次  
九江值安慶再陷賊船上犯湖口忠源偵知賊所向卽日聞道  
馳赴南昌部署略定而賊至忠源告急於湖南公檄江忠淑由  
瀏陽赴江西朱孫詒羅澤南等由醴陵繼進另派鎮筭兵千人  
令夏廷樾總統之會朱孫詒有違言湘勇無統帥郭嵩焘說孫  
詒率所部以行嵩焘因亦隨行是爲湘軍出境剿賊之始 是  
月琦善陳金綬勝保攻揚州大捷僞丞相林鳳祥留僞指揮曾

立昌踞揚城驅婦女及所劫貲財回金陵率賊二十一軍北竄  
每軍數千人擾滁州踞臨淮關二十日陷鳳陽府復遣逆酋  
朱錫琨黃益芸犯浦口攻六合知縣溫紹原拒之於龍池賊營  
火起燔死者數千人餘賊退回金陵 五月公弟國葆募湘勇  
一營駐長沙南門外公諸弟從軍自此始 是月左副都御史  
雷以誠駐軍揚州萬福橋扼賊竄裏下河之路 楊秀清遣偽  
丞相吉文光由浦口竄亳州會林鳳祥陷河南歸德府遂犯開  
封將軍託明阿等擊走之 六月公疏稱搜拿土匪隨時正法  
發審局審訊各案粗有頭緒臣母喪初周擬回籍終小祥之禮  
聞賊竄江西應留省城會籌防剿不敢以事權不屬稍存推諉

又與駱秉章會參長沙協副將清德請

旨革職以儆疲玩而肅軍政並疏薦參將塔齊布千總諸殿元  
請破格超擢奉

旨塔齊布賞副將銜諸殿元以守備用清德革職逮問時塔齊  
布署撫標中營參將日討軍實而訓練之鮑起豹至省城宣言  
盛夏操兵之非又與湘勇交証清德依附鮑起豹與塔齊布爲  
仇故公特參之 是月僞豫王胡以暭攻江西省城用地雷轟  
塌德勝門月城六丈江忠濟率楚勇禦郤之城復完 林鳳祥  
吉文光由鞏縣渡黃河犯懷慶府 欽差大臣訥爾經額山東  
巡撫李德學士勝保將軍托明阿提督善祿都統西凌阿副都

統雙成皆會師懷慶知府余炳濤知縣裘寶鏞破賊地道數處  
城賴以全 鎮江賊犯鄧紹良營官軍失利紹良退守丹陽向  
榮遣和春扼徒陽運河以保常州府 七月湘軍抵南昌南昌  
城外賊壘惟文孝廟數座官軍屢攻不能克日有死傷郭嵩燾  
偶獲賊諜訊之則賊皆舟居文孝廟賊壘環三面築牆而虛其  
後專以翼蔽賊舟而已嵩燾因獻議曰東南各行省州縣多阻  
水江湖一日遇風連數百里賊舟瞬息可達官兵卒由陸路躡  
之其勢常不及長江數千里之險遂獨爲賊所有且賊上犯以  
舟楫而官軍以營壘禦之求與一戰而不可得宜賊勢之日昌  
也忠源大蹙之卽日具疏請

飭湖南湖北四川仿照廣東拖罟船式各造戰艦數十飭廣東  
製備礮位以供戰艦之用奉

旨允行長江水師之議自此始 是月訥爾經額等攻破懷慶  
城外賊柵林鳳祥等解圍遁 湘軍夏廷樾等攻吉安賊賊解  
圍去復分剿太和安福賊悉平之 八月公疏稱衡永郴桂匪  
徒聚積之數月以來巨案迭出卽日移駐衡州就近調度蓋  
提督鮑起豹與公時相齟齬營兵與湘勇斷斷不合至有械鬪  
之案衡州之行所以避之也 公旣至衡州衡陽廩生彭玉麟  
故有名公一見器之又調湘陰外委楊載福至並令幫辦弟國  
葆營務國葆力薦彭楊之才當任一軍不宜屈爲幫辦公方奉

湖南造船之命謀治水師衡州乃檄二人各募水勇領一營彭  
楊受命治水師自此始 二十二日南昌解嚴賊遂陷九江府  
湖口縣仍陷安慶踞之復分股竄湖北

詔以吳文鎔爲湖廣總督張亮基調山東巡撫文鎔公座師也  
聞警由黔急馳赴鄂 是月林鳳祥等陷山西平陽府勝保追  
至賊竄洪洞縣陷之山西巡撫哈芬奉

旨逮問訥爾經額馳回正定

詔授勝保爲 欽差大臣

賜神雀刀自副將以下失律者先斬以聞 林鳳祥陷臨洺關  
犯深州陷之訥爾經額逮問

詔授惠親王爲奉命大將軍科爾沁郡王僧格林沁爲參贊大臣統四將軍兵會勝保進剿都城設巡防所 九月十三日張亮基師潰於田家鎮江忠源聞道馳援戰不利北屯廣濟賊遂趨武昌吳文鎔至長沙聞敗狀連夜赴武昌入守之而賊已陷黃州漢陽北擾德安南及興國岳州戒嚴公與湘撫駱秉章籌辦防堵檄調援江西諸軍回湘奉

上諭長江上游武昌最爲扼要若稍有疎虞則全楚震動著駱秉章曾國藩選派兵勇並酌撥礮船派委得力鎮將馳赴下游與吳文鎔等會合剿辦力遏賊鋒毋稍延誤公受

命剿賊自此始 時吳文鎔屢請援師

上以公團練鄉勇著有成效飭令帶兵援鄂餉需責駱秉章籌濟又以武昌危急江忠源尙須先赴漢陽冀圖收復未能卽抵省垣責吳文鎔等悉力堅守並令台湏撥兵往援益趣公北行爲武昌策應於是公檄知府張丞實同知王金率湘勇三千預備援鄂是月勝保克深州十月初五日賊棄漢陽東下武昌解嚴公疏言該匪以舟楫爲巢穴以擄掠爲生涯千舸百艘游弋往來長江千里任其橫行我兵無敢過而問者夏閭署督臣張亮基造船運礮設法興辦尙未完備忽田家鎮失守戰船悉爲賊有現在兩湖無一舟可爲戰艦無一卒習於水師若馳赴下游則賊以水去我以陸追曾不能與之相遇又何能竊加

攻剿再四籌思總以辦船爲第一先務臣現駐衡州試辦如舟師辦有頭緒卽親帶赴下游

硃批是之公欲募湘勇六千合江忠源所部爲萬人甫立此議

忠源疏請

飭公以所練六千人出省剿賊

上以湖北情形緊要留忠源在鄂趣公帶楚勇六千人酌配礮械籌僱船隻駛出洞庭湖由大江迎頭截剿肅清江面賊船於是忠源回軍漢陽

詔授爲安徽巡撫

諭以楚皖一體斟酌緩急相機進剿時安慶已爲賊踞議建廬

州爲省會忠源受命力疾北趨廬州 是月林鳳祥陷靜海縣分踞獨流鎮楊柳青勝保屢擊敗之 秦日綱陷桐城舒城犯廬州侍郎呂賢基等死之 十一月宋晉奏曾國藩鄉望素孚人樂爲用請飭挑選練勇僱覓船隻順流東下與江忠源水陸夾擊

上以疏示公

諭曰現在安徽逆匪連陷桐城舒城逼近廬郡呂賢基殉難江忠源患病皖省情形危急總由江面無水師攔截進剿任令賊蹤往來自如該侍郎前奏亦曾慮及著卽趕辦船隻破位並前募勇六千內洞庭湖駛入大江與江忠源水陸夾擊該侍郎忠

誠素著兼有膽識朕所素知必能統籌全局不負委任也公覆言自田家鎮失防吳文鎔駱秉章與臣往返函商十餘次皆言各省分防糜餉多而兵力薄數省合防糜餉少而力較厚江忠源張芾亦言四省合防之道兼籌以堵爲剿之策臣本思率師東下重以

新命敢不捐糜頂踵急圖報稱惟礮船一件不宜草率從事必中宮能載千餘斤之礮兩旁能載數百斤之礮乃足壯軍威而摧逆燄又須俟廣西右江道張敬修購買夷礮廣礮千尊由韶來楚乃足以資配放至募勇一事陸勇六千已屬整備水勇亦須奏成四千統計船礮水勇二者皆非一月所能辦明春乃可

成行

硃批現在安省待援甚急若必偏執己見則太覺遲緩朕知汝尙能激發天良故特命汝赴援以濟然眉今觀汝奏直以數省軍務一身克當試問汝之才力能乎否乎平時漫自矜詡以爲無出己之右者及至臨事果能盡符其言甚好若稍涉張皇豈不貽笑於天下著設法趕緊赴援能早一步卽得一步之益汝能自擔重任迥非畏葸者比言旣出諸汝口必須盡如所言辦與朕看公瀕陳五事一起行之期必俟張敬修解職到楚一黃州有賊援兵不能遽達皖境一論天下大局武昌爲必爭之地能保武昌則扼金陵之上游固荆襄之門戶通兩廣四川之餉

道一陳勇現辦郴桂土匪不能遽行撤回一餉乏兵單成效不敢必與其將來毫無功效受大言欺君之罪不如此時據實陳明受畏葸不前之罪

硃批成敗利鈍固不可逆觀然汝之心可質天日非獨朕知若甘受畏葸之罪殊屬非是常甯土匪攻陷縣城連陷嘉禾藍山二縣公遣弟國葆及儲政躬等討平之是月向榮遣兵圍鎮江琦善圍揚州洪秀全遣僞丞相賴漢英等領江西敗賊援揚州副都統薩炳阿擊却之賴漢英復由三汊河進撲我軍失利揚州踞賊曾立昌突圍出竄瓜洲秀全又令皖賊窺東壩冀解鎮江之圍向榮遣鄧紹良擊却之勝保軍擊林鳳祥於津

衛口敗績都統佟鑑知縣謝子澄死之 十二月公疏稱衡永  
郴桂尙有會匪餘黨實爲湖南巨患亦是臣經手未完之件  
硃批汝以在籍人員能如是出力已屬可嘉著知會撫臣剿辦  
或有汝素來深信之紳士酌量辦理亦可 十七日賊陷廬州  
府巡撫江忠源死之初忠源由六安至廬州以所部鶴麗鎮兵  
留防六安到廬者僅開化鎮軍勇數百而已僕東王楊秀清遣  
僞豫王胡以眺率黨十餘萬圍廬州忠源登陴固守城旋摧旋  
完總兵玉山由滁州援拱辰門戰歿陝甘總督舒興阿率萬五  
千人駐岡子集屢戰皆北鶴麗鎮總兵音德布由六安馳援亦  
敗於棗林忠源弟忠潛同知劉長佑自湖南募勇至營西平門

外五里墩遣卒挾白鑼油燭夜半絕城入且告援師已至都司  
戴文蘭亦自湖北以五十八人懷鑼入城城外賊騎充斥援師  
中隔卒不得薄城賊圍城月餘十六日夜再穴水西門城崩賊  
緣牆直上忠源揮兵搏戰天且明霧藪藪如雨左右血及擁忠  
源行忠源手劍自刎不殊有健兒負之走噉其項脫身投古塘  
死同時殉難者布政使劉裕鉉池州府知府陳源堯已革藩司  
李本仁同知鄒漢勳胡子離副將松安都司戴文蘭馬良勳縣  
丞艾延輝興福 忠源字岷樵少而豁朗英峙以拔貢生舉丁  
酉鄉試大挑教職客京師時與公友善公嘗目送之曰岷樵天  
下奇才他日當以功業顯顯則必死於王事道光末年雷再浩

作亂忠源一戰破焚其巢誘賊黨縛再浩礮之敘功 賞戴藍  
翎以知縣發浙江咸豐元年丁家艱歸大學士賽尚阿督師廣  
西馳疏調忠源赴粵既至則大爲副都統烏蘭泰所賓敬事無  
巨細必再諮而後行人無親疏貴賤必察其意嚮而厚薄之敘  
勞擢同知直隸州換戴花翎烏蘭泰慷慨負氣與提督向榮積  
有違言忠源以書曉譬烏蘭泰禮下之已甚冀感動榮卒不能  
得逮圍賊永安復代爲一書抵榮力諫圍師缺隅之說請合圍  
而盡殲之又不能得因引疾歸歸而永安賊出遂至桂林忠源  
聞警募勇倍道赴援將終佐烏蘭泰以平嶺表未至而烏蘭泰  
陣歿自是獨領一隊賊中往往目爲江家軍矣忠源旣倡義師

轉戰湘鄂赴援江西皆率疲卒當劇寇所向輒克於是英聲聞天下數年游膺開府

朝廷將倚之辦賊不復中制海內企踵喝喝亦咸知非斯人莫屬也其自鄂之皖礮雨而行將卒多道病忠源亦病至六安僥甚六安吏民遮道請留不許昇疾竟達廬州部分未定而賊大至忠源設策應敵士不滿千人糧米鉛藥皆罄病益困不食數日矣死年四十二事聞

上震悼追贈總督賜祭葬予謚忠烈廬州及湖南江西皆建祠咸豐四年正月湖廣總督吳文鎔戰歿於黃州初文鎔主堅守武昌之策湖北巡撫崇綸以閉城株守効之

嚴旨切責文鎔乃督師黃州遺書於公言吾意堅守待君東下今爲人所逼以一死報國無復他望君所練水陸各軍必俟稍有把握而後可以出而應敵不可以吾故而率爾東下東南大局恃君一人務以持重爲意恐此後無有繼者吾所處與君固不同也文鎔駐營堵城亟攻黃州不下賊焚毀堵城營壘文鎔力戰陣亡賊船乘勝上犯武昌戒嚴

上諭此時惟曾國藩統帶礮船兵勇迅速順流而下直抵武昌可以扼賊之吭此舉關係南北大局甚爲緊要該侍郎應能深悉緊急情形兼程赴援初公在衡州創立水師前無成法每遇廣東員弁及長年三老能行船者周咨博采屢更其制後乃

稍仿廣東拖罟快蟹長龍之式增置槳座命守備成名標監督之另檄廣西同知褚汝航夏鑾等分設一廠於湘潭既成軍邀長沙黃冕觀之冕獻言曰吾出入兵閒十餘年所見軍容整齊無及此者然長江千里汊港紛歧賊船易於藏匿江南小戰船曰三板者每營請添十號以備搜剿汎之用公大贊之卽日改定營制每營置快蟹一營官領之長龍十日正哨三板十日副哨快蟹槳工二十八人櫓八人長龍槳工十六人櫓四人三板槳工十人每船另置碇手三人艙長一人頭工二人柁工一人副柁二人水師之制於是大備公旣聞江忠源吳文鎔相繼殉節乃經營東征募水師五千人以褚汝航爲總統而成名標

諸殿元楊載福彭玉麟鄒漢章龍獻琛等分領之又募陸師五千人以塔齊布爲先鋒而周鳳山儲致躬甘源恩鄒世琦鄒壽章楊名聲及弟國葆等分領之始設立八所曰文案浙白內銀錢所曰外銀錢所曰軍械所曰火器所曰偵探所曰發審所曰採編所皆委員司之齋米煤鹽油及軍火器械載民船百數十號以行員弁勇夫共一萬七千餘人軍容於斯爲盛 賊陷漢陽按察使唐樹義死之 是月僧郡王會勝保擊賊於獨流鎮大破之餘匪由靜海分竄僧王勝保擊敗之 二月初一日賊酋石祥貞陷岳州府遂陷湘陰趨靖港陷甯鄉騎秉章遣王金  
敗賊於喬口公舟師次長沙遣弟國葆及儲致躬趙煥聯等分

道攻剿致躬破賊於甯鄉逐北陣亡賊大奔潰遣舟師追擊走之時貴州黎平知府升用道胡林翼應前總督吳文鎔之調帶練勇六百人由黔赴鄂行次金口聞文鎔已歿賊舟士犯阻隔不能進公急調之回湘咨商駱秉章支給餉糈胡林翼以二軍從公剿賊自此始

上諭據青麟奏稱探聞曾國藩帶勇已距金口百有餘里貴州道員胡林翼隨同前來現復退往上游賊船颶忽上竄急須出其不意順流驅擊該侍郎礮船早入楚北胡林翼何以退守金口著曾國藩飭知該道迅速前進毋稍遲延公疏陳胡林翼未能赴鄂之由且稱林翼之才勝臣十倍將來可倚以辦賊旋

檄林翼剿崇陽通城土匪又令塔齊布往助之時官軍連敗賊於靖港新康賊棄湘陰岳州而遁公親赴岳州搜捕西湖餘匪是月楊秀清遣僞將軍孫寅三陷祁門復陷太平府前學政孫銘恩死之僧王克堆村連村林家場林鳳祥退入阜城縣三月貴東道胡林翼知縣林源恩敗賊於平江斬僞丞相林大旺僞檢點陳六輔僞司馬黃奇瑜及土匪僞王廖六胖子塔齊布敗賊於白港初八日收復通城縣巡撫駱秉章疏請留公暫緩赴鄂

硃批楚南之賊明係分竄現在湖北尙有多賊曾國藩破船原爲肅清江面第此時道路不通暫可留在湖南剿辦亦不能專

待事竣緩緩北上楚南辦有頭緒仍應速赴湖北爲是會國藩素明大義諒不至專顧桑梓置全局於不問北重於南皖鄂重於楚南此不易之局也又奉

寄諭此時得力舟師專恃會國藩水師一軍倘涉遲滯致令漢陽大股竄踞武昌則江路更形阻隔朕旣以剿賊重任畀之會國藩一切重情不爲遙制先是公派陸軍由崇通剿賊冀以次掃蕩進援武昌而自統水師順流而下旣至岳州遭風撞損破船而王金之軍抵羊樓司者遇賊潰回賊乘勝上犯公弟國葆及鄒壽璋楊名聲等營皆潰退入城賊攻城甚急公檄舟師登岸擊賊拔出城中軍民退保長沙因上疏自効奉

上諭曾國藩奏水陸各軍接仗情形並自請治罪一摺此次岳州水軍雖獲小勝惟因陸路失利以致賊匪復行上竊曾國藩統領水陸諸軍調度無方實難辭咎著交部嚴加議處仍著督帶師船迅速進剿克復岳州卽行赴援武昌毋得再有遲誤又奉

諭曾國藩所統各勇爲數過多旣須剿辦粵匪又須搜捕土匪卽如所奏有撥赴平江通城者有撥赴臨湘蒲圻者又有不能依限前進者散布各處照料旣不能周剿捕自難得力一有敗衄人無固志似此何能力圖進取此時肅清江面專恃此軍曾國藩初次接仗旣有挫失且戰船被風沈損多隻何事機不順

若是現在湖北待援孔亟曾國藩以在籍紳士專顧湖南不爲  
通籌大局之計平日所以自許者何在 胡林翼擊賊於上塔  
市塔齊布擊賊於沙坪皆大破之 公因長沙戒嚴檄胡林翼  
塔齊布回湘助防 賊酋石祥貞踞靖港分股由甯鄉陷湘潭  
遂於湘水上游掠民船數百豎立木城以阻援師二十八日塔  
齊布率師赴援大捷於湘潭斬馘數千級 是月林鳳祥吉文  
光在河北被圍洪秀全遣安徽逆衆由豐工渡黃河竄山東陷  
金鄉縣遂陷臨清州勝保偕僧王軍攻克之僞丞相曾立昌許  
宗揚均溺斃於漫口支河僞副丞相陳世保先於冠縣燒斃髮  
逆殲盡東路平 賊連陷德安安陸二府湖廣總督台湧退至

隨州湖北巡撫崇綸以憂去任

詔授青麟爲湖北巡撫 四月公遣水陸各軍擊賊於湘潭連  
破之遂克其城初塔齊布屢戰皆捷燬賊木城賊復豎木相拒  
塔齊布與周鳳山李輔朝分兩路進剿賊分五路蜂擁而前塔  
齊布手執大旗麾軍猛進周鳳山繼之縱橫血戰再燬其木城  
甫回營造飯賊張兩翼撲營塔齊布令兵勇僞退誘賊逼近從  
營後繞出圍逼至嶺下塘邊淹斃無算公聞陸師大捷遣知府  
褚汝航知縣夏鑾千總楊載福生員彭玉麟周世琦等率水師  
助之賊據民船數百方順流而下初一日褚汝航等分隊迎敵  
長龍在前三板在右斜出轟擊夏鑾彭玉麟楊載福各選勁勇

飛駕快蟹直撲賊船焚燬六十餘號生擒長髮賊一百二十餘名是時陸路之賊因連次敗北遷悍黨爲先鋒分三路來戰塔齊布身先士卒往來衝突衆皆披靡兵勇乘機拋擲火器燒燬賊踞房屋賊遁入城塔齊布以連日血戰傳令暫歇夜四鼓賊從上游燒放火船數隻小船載油燈無數隨之翼驚擾我軍兵勇乘三板撐開火船任其自燒全軍無恙初二日褚汝航擂鼓督戰彭玉麟楊載福乘小艇往來礮聲如雷湘波鼎沸楊載福身受鎗傷尙復指揮鏖戰自辰至酉燬賊船三百餘號延燒街市百里外遙見火光燭天初三日賊船數百駛至窑灣希圖乘風上竄初四日卯刻彭玉麟楊載福率戰船跟追午刻至下攝

司見檣帆林立船上馬匹財物甚夥飭衆勇毋許掠取專意射  
火焚船時北風正勁順風縱火自卯至未燬船六七百隻紅巾  
黃巾隨波上下殘賊逃入潭城委員江忠淑領知設伏城旁初  
五日寅刻賊由西門緣梯而下伏兵奪梯登城大呼賊不辨我  
軍多少倉卒狂竄江忠淑整隊入城塔齊布繼至分門搜剿擒  
僞五軍統領大元帥羅姓僞春官副侍衛書士汪秉義僞司馬  
王玉春洪大貴是役也八日之內水陸十獲大勝斃賊近萬所  
獲旂幟器械無算凶渠僞目或斃於水或斃於火被擄解散者  
約以萬計羣賊互相疑貳自行屠戮者數百人爲公軍第一奇  
捷諸將敘獎有差 當我軍之戰於湘潭也公慮靖港踞賊往

援初二日卯刻親率戰船四十隻陸勇八百邀擊賊於靖港西南風發水勢迅速爲賊所乘師潰公自投於水左右救之獲免乃回長沙重整水陸各軍因言吾水陸萬人非不多而遇賊卽潰岳州之敗水師拒敵者楊載福一營湘潭之戰陸師塔齊布兩營水師楊載福兩營用此益知兵貴精不貴多而引諸葛公祁山之敗且謀滅兵省食勤求己過又曰古人用兵先明功罪賞罰今時事艱難賢人君子大半潛伏吾以義聲倡導鄉人同履危亡之地諸君之初從我非以利動也故於法亦有所難施所以兩次致敗其弊亦由於此因疏奏湘潭靖港勝負各情並自効畧云臣之所失約有數端征戰之事論膽技或兵不如勇

論紀律則勇不如兵募勇萬人必須有大員協同管帶又須有文武員弁及得力紳士一二百人節節統轄臣每營僅一二官紳主之紀綱不密以致潰敗其謬一靖港之敗臣因湘潭大捷意欲同時並舉使賊首尾不能相顧是日風太順水太溜進戰則疾駛如飛退回則寸步難挽但知輕進之利不預爲退敗之地其謬二水勇無會經行陣之人陸勇雖經訓練亦須隨同久經戰陣之兵接仗一二次乃可期其得力今驅未經戰陣之勇驟當百戰凶悍之賊其謬三臣孤憤有餘智略不足仰累

聖主知人之明應請從重治罪以示大公

上諭屯聚靖港逆船經會國藩親督舟師進剿雖小有斬獲旋

以風利水急戰船被焚以致兵勇多有潰敗據曾國藩自請從重治罪實屬咎有應得姑念湘潭全勝水勇甚爲出力著加恩免其治罪卽行革職仍趕緊督勇剿賊帶罪自効湖南提督鮑起豹自賊竄湖南以來並未帶兵出省屢次奏報軍務僅止列銜會奏提督有統轄全省官兵之責似此株守無能實屬大負委任鮑起豹著卽革職所有湖南提督印務卽著塔齊布暫行署理又

諭曾國藩統領舟師屢有挫失此摺所陳紕繆各情朕亦不復過加譴責現在所存水陸各勇僅集有四千餘人若率以東下誠恐兵力太單該革員現復添修戰船換募水勇據稱一兩月

聞當有起色果能確有把握亦尙不難轉敗爲功目下楚北賊  
蹤由應山竄回德安隨州之賊亦回武漢是鄂省望援甚急該  
撫等務當卽飭水陸各軍迅將此股敗竄之匪殲滅淨盡兼可  
赴援武昌以顧大局 是月賊陷荊門州犯荊州府將軍官文  
遣王國才敗賊於龍會橋賊復由荆門西竄 二十日賊陷宜  
昌府總兵訥欽知府吳開陽先期棄城走初東湖縣知縣張軒  
鵬與四川生員李光榮招募川勇冀保川鹽運道川勇多三峽  
刺盜在郡騷擾軍民大訑聚萬餘人至總兵衙門縛叛勇楊五  
誅之軒鵬籍四川不自安求卸任適新選巴東縣知縣鄭奎齡  
赴任過郡吳開陽檄委代之接篆甫三日而城陷於是四鄉土

匪滋起有川賊數百人盤踞石牌峽中劫掠行旅殺人輒投之江凶殘尤甚於賊川楚之路遂塞僧王克阜城縣林鳳祥陷景州遣黨分踞連鎮五月初一日訥欽吳開陽等收復宣昌賊陷城後聞四川兵駐巴東荊州軍亦將西上乃乘城南竄訥欽吳開陽鄭奎齡相繼入城城中尸骸數千狼籍臭穢居民不敢回邑紳王氏釀金募人掩埋殘尸洗濯街道焚香又於途而川匪之踞石牌峽者劫掠如故王紳白開陽奎齡請捕治之訥欽以營兵潰逃非餉不能聚王紳毀家貲獨任餉事兵始集訥欽遣游擊某率兵沿江西上王紳先期赴鄉集鄉勇數百人從岸上會剿賊猶開礮抗拒我軍直前奪賊船數隻生擒三十八

人餘賊解散賊酋何二何五李州望者皆正法而各鄉土匪向  
二羅三劉狗子鄒玉喜等悉伏誅川楚之路始通 公所設衡  
州湘潭船廠續成船六十號長沙廠重修船百數十號另募水  
陸勇數千人調羅澤南李續賓所部湘勇回長沙因疏稱現將  
水陸各軍嚴汰另募重整規模一俟料理完竣卽星夜遄征誓  
滅此賊以雪挫敗之恥以贖遲延之罪

上諭會國藩添募水陸兵勇及新造重修戰船旣據奏稱已可  
集事則肅清江面之舉仍藉此一軍以資得力塔齊布膽識俱  
壯堪膺剿賊之任著駱秉章卽飭統領弁兵迅速出境會國藩  
與該提督共辦一事尤應謀定後戰務期確有把握萬不可徒

事孟浪再致挫失。自公軍克湘潭岳州踞賊亦棄城東走已而糾黨上犯陷華容復踞岳州分擾洞庭之西湖十三日陷龍陽掠民船攻常德府十六日陷之而湖北之賊由宜昌枝江松滋入太平口與西湖賊合連陷澧州安鄉等城賊氛蔓延湖南北公乃調知府李孟羣於廣西總兵陳輝龍於廣東各率水師赴湖南會剿軍聲復振。是月僧王勝保克連鎮林鳳祥陷高唐州。官文遣軍克石首縣。青麟遣都司楊昌泗副將書紳副都統魁玉破賊於磯窩又遣總兵侯鳳岐等破賊於塘角鮎魚套等處。安徽知州茅念劬克六安州。六月公整軍東下水師分三起先遣褚汝航率礮船四營當前敵陸師亦分三路

以塔齊布爲中路駐新牆胡林翼等由西路趨常德江忠淑林源恩等由東路趨崇通賊聞官軍大至棄常德澧州併力守岳州是月初二日賊陷武昌布政使岳興阿按察使曹懋堅督糧道李卿穀死之自賊踞漢陽以全力圖武昌巡撫青麟所統僅千餘人涼州高州二鎮屯兵城外名雖爲援實僅能自守居民亦遷徙殆盡守陴卒不敷雉堞數餉絀數月青麟以家中金玉珍物充犒賚不足則取衣裘以代之援絕食盡親與士卒唱糠糲困守孤城衆不忍舍去城陷將自縊衆擁之出欲赴荆襄無路可通乃與魁玉楊昌泗南走長沙繞赴荊州奉

旨數其棄城越境之罪卽在荊州正法總督台湧革職

詔授楊需爲湖廣總督 荆州將軍官文遣林天直克沔陽州  
七月初一日公軍克岳州府初賊於東南門外添築土城木  
城二十餘座新牆對河及各市鎮等處四路設卡折毀橋梁爲  
負嵎久抗計二十七日褚汝航等進泊萬石湖駕小舟往君山  
偵地形設伏於君山雷公湖等處二十九日夏鑾等率水師誘  
敵數次賊舟蜂擁而出忽楊載福雷公湖伏兵先起彭玉麟君  
山伏兵繼起褚汝航亦至併力合攻擊沈賊船數隻轟斃黃衣  
賊目賊船登時淆亂自相碰撞我軍嚴鼓進追燬沈賊船百餘  
號轟斃溺斃約二百餘名生擒六十餘名奪獲賊船三十四隻  
器械旗幟僞書無算是夜各營暫泊君山東岸南津港賊舟宵

遁次日五鼓各戰船駛至城下見水陸無一賊褚汝航率水勇收復府城初三日褚汝航等復大捷於城陵磯殲斃僞丞相汪德勝燬賊船四百餘號追至臨湘對河距岳州七十五里始收隊而陸軍塔齊布等沿岸截剿頗有斬獲捷聞奉

上諭覽奏稍慰朕懷汝能迅速東下藉此聲威或可掃除武漢之賊朕日夜焦盼憂思彌增獲船陸勇終恐未可深靠又

論此次克復岳州大獲勝仗湖南逆蹤業就肅清江路已逼重湖無阻卽著塔齊布會國藩會督水陸兵勇乘此聲威迅速東下力擣武漢賊巢以冀蕩平羣醜初六日褚汝航楊載福彭玉麟敗賊於道林磯時北風大作賊船續至五六百號我軍危

急楊載福駕三板船繞出賊船之背乘風縱火連燒十數船上  
游賊船大亂彭玉麟奪獲五采畫龍賊船一隻身受三傷裹創  
復進夏鑾槍斃僞檢點黎振輝僞丞相會姓餘匪上岸撲水分  
頭狂竄焚燬賊船四百餘號斃賊二千餘名生擒百數十名褚  
汝航督兵直過城陵磯賊正欲抄襲塔齊布陸路伏兵四起水  
師復分途迎擊賊衆大潰十五日公抵岳州十六日陳輝  
龍褚汝航擊賊於城陵磯值南風大作輝龍欲收隊因沙鎮邦  
乘勝跟追飭派拖罟船趕往救護船身重大膠淺於旋渦激流  
之中爲賊所乘陳輝龍沙鎮邦皆戰沒褚汝航夏鑾馳往援救  
被創落水死之十八日塔齊布破賊於城陵磯陣斬僞秋官

丞相曾天養追至擂鼓台斬賊八百餘名曾天養廣東惠州人年六十許綈髯深目威令素行於衆賊中善用兵者自楊秀清外推天養爲最伏誅之後岳州及武漢之賊爲之茹齋六日

二十一日塔齊布敗賊於城陵磯諸殿元劉士宜戰歿二十

六日塔齊布羅澤南會破援賊於九塘嶺鳳皇山初賊見我軍屢勝調湖北逆黨二萬赴援營於高橋距羅澤南湘勇營十里塔齊布鳳凰山大營十四里賊首犯澤南營踞九塘嶺燒燬望樓澤南督李續賓大呼衝突直趨高嶺陣斬鶴國宗石姓追至高橋其分撲鳳凰山者數以萬計塔齊布親督將士由中路先進刀斃執旗賊目賊陣始亂周鳳山彭三元分左右繼進賊布

螃蟹陣分十餘路圍繞抄擊我軍亦分十餘路迎敵呼聲震天  
斃賊六百餘名山下突出三騎招手呼塔齊布名塔齊布應聲  
撲去手刃其一餘二賊下馬率衆紛逃適羅澤南亦至會合併  
攻賊過河溺斃者不計其數 二十八日塔齊布羅澤南擊賊  
於高橋敗之 二十九日賊犯官軍營塔齊布羅澤南連擊敗  
之 李孟羣率水師破賊於城陵磯東岸追至擂鼓台西岸追  
至荆河腦賊大敗潰 公疏稱岳州四次獲勝情形

上諭塔齊布曾國藩自帶兵以來旣未嘗遇敗而怯定不致乘  
勝而驕總宜於安速之中持以慎重則楚省賊蹤漸可掃蕩  
是月十五日鄂軍知縣林天直克仙桃鎮十六日副將劉富成

克安陸府二十二日官文遣軍克天門縣於是漢陽黃州府屬相繼收復 向榮遣軍克高淳縣

詔授胡林翼四川按察使 閏七月初一日李孟羣敗賊於城

陵磯 初二日塔齊布等燬高橋賊壘追賊於城陵磯大破之

初塔齊布匹馬偵高橋賊營見燈火達旦往來不絕知賊將他竄天明派羅澤南李續賓李原濬三路並進直抵高橋見賊營多張旗幟每營僅數十人我軍撲入燒燬賊營七座塔齊布率李續賓直赴城陵磯賊正出隊約二萬人相持一時之久塔齊布躍馬大呼首先陷陣湘勇繼之適大雨如注東南風大作乘

風猛撲隔竹簽數丈濠溝兩重大呼躍入殺聲與風雨聲相應

震動天地前後踏毀賊營十三座斃賊二千名公復遣李孟羣率水師三營奮力追剿羣賊驚竄時已昏黑暫泊擂鼓台下黎明從荆河順流而下東岸之旋湖港芭蕉湖道林磯鴨欄磯西岸之觀音洲白螺磯陽林磯螺山夾洲一帶踏平賊壘九座礮台三座窮追二百餘里前隊至嘉魚縣境羣賊悉數遁回武昌公進駐螺山捷聞奉

旨賞給三品頂戴李孟羣楊載福等率水師乘勝東下搜捕沿江汊港賊船焚燬略盡遂抵金口二十六日塔齊布陸軍破賊於羊樓司官文遣魁玉楊昌泗會公軍收復嘉魚蒲圻二縣是月向榮遣張國樑攻克太平府六安州知州李元善

克英山縣 八月初四日塔齊布克崇陽縣生擒僞丞相金亨又破賊於咸甯公進駐嘉魚捷聞奉

硃批汝等自湘潭大捷後屢次得手有此聲威豈可自餒惟利在速戰莫待兩下相持師勞餉乏大有可慮處塔齊布不致爲崇陽一敗牽制方好 十一日公進駐金口塔齊布羅澤南破賊於橫溝橋遂與公師會適荊州將軍官文遣魁玉楊川泗等軍五千人亦會於金口因遣魁玉等擊破沌口賊公集諸將商取武昌之策羅澤南袖圖進日洪山花園兩路皆賊重兵所在花園瀕江環城尤賊勢所注賊壘九座每壘數千人長濠巨障袤延數里吾所部不滿三千以當洪山之賊有餘以擊花園不

足請與塔將軍分任之花園洪山賊壘破武昌無自固之勢賊  
將自遁無憂也公曰羅君勝算虜在吾目中矣花園賊壘仍煩  
君一行請加派兵二千以助君議定因疏陳規復武漢情形略  
云逆黨盤踞武漢約二萬餘人自沌口以下東西兩岸水陸賊  
營密布連日再四詳究進攻武昌之路有三一爲古驛路由油  
坊嶺以達洪山一爲新驛路由湖隄以達板橋一爲沿江之路  
由金口以達花園進攻漢陽之路亦有三一爲沿江之路由沌  
口以達鸚鵡洲一爲襄河之路由蔡店以達西門一由襄河建  
瓴而下臣等悉心定議必以水師先剽江而使武漢之賊消息  
隔斷陸路則先攻武昌後攻漢陽臣塔齊布暫駐紙坊總要之

區遣羅澤南等出金口一路先攻花園賊營然後由古驛路進  
攻洪山至西岸沿江一帶則令魁玉楊昌泗等率荊州兵進攻  
一面咨明署督臣楊霈夾攻漢陽之背以期諸軍會合迅復堅  
城 二十三日公軍克復武昌遂克漢陽僞國宗石鳳魁副丞  
相黃再興棄城遁初僞東王楊秀清以黃綬僞誥諭給僞國宗  
韋以德令守武漢而石鳳魁黃再興佐之公軍至金口韋以德  
遜回金陵公旣定三路東下之策遣羅澤南李光榮攻東岸花  
園魁玉楊昌泗攻西岸蝦蟆磯而自率李孟羣水師從大江中  
路衝擊花園外瀕大江內枕青林湖賊立三大營掘深溝寬二  
丈長三里引江水以達於湖溝內周立木城實以土沙中開礮

眼溝外密布木椿竹籤環以荆棘城上安礮百餘尊向江者阻我水師向南者阻我陸軍西岸蝦蟆磯賊營與花園相等賊船泊守兩營之下水陸依護二十一日公與李孟羣令水師分前後兩班前班從中流飛駛衝過鹽關直至鵝洲賊見我軍猝出其後回船下救我軍分兩翼自下抄繞而上後班戰船自上排轂而下賊前後被擊紛紛落水公見五綵蓬賊船冒死向前知爲悍賊諭將士奪五綵蓬者賞錢百緡秦國祿等六人各奪其一賊撲水登岸楊載福縱火延燒鹽關賊船二百餘號頃刻俱盡東岸花園賊船見西岸已敗相率亮逃我軍乘勝焚之時羅澤南陸軍分三路攻花園李光榮及唐訓方攻中路李續賓

攻江邊羅澤南攻湖邊賊自木城開礮子如雨下澤南先燒營  
外賊划百餘號令軍士手槍持滿伏地行近壘始起立施槍續  
賓光榮等從竹木籤中踰溝直入縱火焚其營壘時西岸魁玉  
楊昌泗率兵攻蝦蟆磯賊營亦恰衝入土城縱火焚之賊衆踰  
牆四竄竄出江者被殺畢擊竄入裏湖者被魁玉沌口伏兵圍  
剿尸橫遍野兩岸焚營之火與江中三百餘船之火烟燄相合  
天爲之赤楊昌泗窮追直下與水軍夾擊復破鵝鴨洲日已酉  
墜李孟羣尙不肯收隊率楊載福等乘勝直下盡毀沿江木柵  
連破漢關白沙洲金沙洲賊壘遂進攻鮎魚套燒賊船數十號  
延燒火藥船霹靂一聲衆船皆飛賊尸有自半空落者我師亦

傷十七人。二十二日公仍令三路進攻李孟羣率前班先發燒鮎魚套未盡之船旋攻漢陽朝宗門土城楊載福蕭捷三俞晟秦國祿等仍衝過賊營直下塘角何越珽直攻漢口楊載福追賊直逼青山燒燬輪重賊船北風甚勁挂帆西歸見塘角火燄正烈傍西岸而上復隨李孟羣入漢口內河焚賊船賊尸蔽江而下腥臭不可聞李孟羣回軍攻漢陽賊於木柵內開礮拒敵魁玉楊昌泗亦自上游轉戰而下將晴川門大別山木柵木壘悉數焚燬東岸鮎魚套近湖有一賊營傍江街口又一賊壘我軍分兩路進攻川勇新旧勇稍却李續賓由江邊折回急援連艘賊營兩座於是省河上下無一賊船武漢城外無一賊壘四

鼓時賊酋石鳳魁黃再興等開東北門逃竄猶留悍賊數百人  
在西南城搖旗放礮僞作堅守之狀我軍向望山門漢陽門轟  
擊別遣壯士從僻處攀堞而登舉火爲號各營擁入賊衆狂奔  
截殺百餘人生擒僞將軍陳昌貴僞總制丁履之李孟羣自保  
安門緣城而入徑奔其父李卿穀殉難之所痛哭收骨軍士爲  
之感泣其漢陽城上之賊方與水師連破對擊楊昌泗飭軍士  
自南門梯繩而入魁玉伏於西門月湖堤賊由西門奔蔡店伏  
兵殲斃無數午未之間兩城同時克復塔齊布先從油坊嶺伏  
兵於洪山賊自城內竄出者前迫於大兵後迫於危城左近梁  
子湖右隔陽孫湖無路可遁因分三路抗拒我軍亦分三路迎

擊賊向洪山背上奔潰我軍乘之折向沙湖塘角灣地方紛紛赴水紅巾浮波須臾卽沒湖汊淺處賊尸塞滿後至踐尸而逃行至中流亦皆漂溺中有兒童數百人先後奔投湖水塔齊布飭將士大呼救小兒不許投水救活二百餘人賊見小兒免死遂長跪乞命降者七百餘人當羣賊出竄之時先於大宅置火藥然香其上觸者輒被轟燒是日城內發地雷三次震斃數十人數日後猶數處火起市上門窗木器片片打碎所擄幼童數千人酷刑虐使戰敗之後輒大加殺戮以洩其憤其慘毒如此僞國宗丞相所居僞署拆神廟以爲之柎木狼籍一牀之費可值千金我軍奪獲黃傘三百餘柄金冠龍袍各百餘件鏤錫籤

筒至二千餘件之多其僭侈如此撻聞奉

硃批覽奏感慰實深獲此大勝殊非意料所及朕惟兢業自持  
叩天速救民劫也又奉

諭此次克復兩城三日之內焚舟千餘踏平賊壘淨盡運籌決  
策甚合機宜允宜立沛恩施以酬勞勸曾國藩著賞給二品頂  
戴署理湖北巡撫並加恩賞戴花翎塔齊布著賞穿黃馬褂並  
賞給騎都尉世職楚省大局已定亟應分路進剿由九江安慶  
直抵金陵沿江剿賊之事朕以責之曾國藩塔齊布楚省防務  
及搜捕餘匪事宜朕以責之楊霈時襄河賊船尙多公派魁  
玉楊自泗率兵進剿遣楊載福水師泝流入漢縱火焚賊船幾

盡因疏言襄河以內賊船無幾從此壹意東下無後路牽掣之虞然臣細察大局尚有可慮者數端破城以後水陸弁勇各獲財物有飽則颺去之意又以岳州酷暑苦戰保奏稍遲頗生觖望屢勝之後志驕氣溢暗伏挫敗之機此其可慮者一也武昌竄出之賊逃歸下游蘄黃一帶尚有數萬自岳州以下直至金陵數千里淪爲異域小民劫於凶威蓄髮納貢習爲固然雖經諭令薙髮狐疑觀望設官軍稍有敗衄則四面皆賊餉道易斷此其可慮者二也水陸兩軍銀錢子藥取給湖南此後去湘日遠輸轉尤艱一有缺乏軍士潰散前功盡棄此其可慮者三也現在機勢大有可乘臣等急思東下以圖克復沿江諸城然念

三者步步艱難不能不熟思審度縷陳於

聖主之前又言母喪未除遽就官職得罪名教不敢接受巡撫  
關防仍由督臣收存疏入

上念公剿賊東下署撫空有其名賞兵部侍郎銜辦理軍務以  
陶恩培爲湖北巡撫

諭曰曾國藩旣無地方之責即可專力進剿但必須統籌全局  
毋令逆匪南北分竄方爲妥善並隨時知照江皖各撫及託明  
阿向榮等四路兜擊以期直擣金陵迅奏膚功 九月公統師  
東下遣楊載福等破賊於蘄州塔齊布克大冶縣羅澤南克興

主以蘄州賊勢尙衆水師攻剿得手而桂明等陸路一軍未能趕到慮事權不專飭桂明以下文武各員均歸曾國藩節制倘有不遵調遣或遷延畏葸貽誤事機者卽著該侍郎專銜參奏以肅戎行 是月

詔胡林翼調湖北按察使羅澤南補甯紹台道 十月初一日

羅澤南破賊於半壁山斬僞丞相林紹璋僞將軍陳姓僞指揮彭姓斃賊千人賊乘黑夜劫公營公飭水師堅屹不動以拒之

初二日塔齊布進駐軍山遣周鳳山攻富池口克其一壘

初四日羅澤南擊賊於半壁山大破之時澤南與塔齊布營相距十餘里中隔小河我軍搭造浮橋以通兩軍之路橋尙未成

江中賊船數千人忽登岸列半壁山左田家鎮亦渡賊數千人  
列半壁山右澤南登高瞭望見賊約二萬餘我軍纔二千六百  
人軍士恆怯李續賓手刃逃兵三人慷慨誓厲衆志始定澤南  
告諸將士曰賊衆我寡當以堅忍不發勝之卽督勇駐高阜之  
左李續賓駐高阜之右彭三元排列江岸普承堯列馬鈴山左  
均賊連撲我軍不能克半壁山前瞰長江下臨絕地我軍乘勝  
追殺飛陵總阜賊從峭壁橫墜而死者數千人餘賊奔江覓船  
逃歸北岸我軍盡燬南岸賊營遣壯士百餘縋崖而下斫斷橫  
江鐵鎖六條竹櫓四條塔齊布亦陽港分擊斬獲頗多於是官  
軍浮橋始成是役也澤南以少擊衆斬馘及淹斃者萬餘人自

湘潭岳州以來此次斃賊尤爲奇捷云 初七日賊由田家鎮渡江犯半壁山塔齊布羅澤南等擊却之 初八日彭玉麟蕭捷三率水師擊賊於蘄州大破之陣斃數千人 初九日彭玉麟蕭捷三誘賊船出擊復大破之餘船六十隻乘大風挂帆東遁捷聞奉

硃批獲此大勝皆因汝等和衷共濟調度有方故能將士用命以少勝多朕披覽之餘感慰莫能言喻 十三日楊載福彭玉麟擊賊於富池口大破之自我軍攻奪半壁山賊復於南岸富池口結營鐵鎖橫江阻我舟師之路楊載福彭玉麟令水師第一隊駛至鐵鎖之前賊用破船救護第二隊環圍擊之賊勢退

却立將賊船鐵鎖斬截以火具鎔化須臾鎖斷水師飛棹駛下  
賊倉皇竄逸時塔齊布羅澤南陸軍亦從半壁山飛馳而來與  
水勇夾擊盡燬富池口賊壘適東南風起賊舟不能下行我軍  
縱火燎之賊紛紛落水楊載福飭官軍鼓棹而東鄖穴以下賊  
船皆盡前後燒船四千餘號奪獲賊船五百餘隻田家鎮之賊  
不戰自潰蘄州之賊亦聞風宵遁水師遂達九江公進駐田家  
鎮二十五日李孟羣親至九江偵賊斃岸賊百餘名而還

二十六日李孟羣率水師攻九江燒賊船四十餘隻斃賊五六  
百名二十八日塔齊布羅澤南克廣濟縣初僞燕王秦日綱  
憤武漢之失率黨駐田家鎮意圖上犯我軍旣克田家鎮秦日

綱竄踞黃梅縣僞檢點陳玉成竄踞廣濟縣僞冬官丞相羅大  
令塔齊布羅澤南自田家鎮渡江而北營壘未定賊黨已至運  
花橋分兩路來撲塔齊布令周鳳山爲前鋒自率各軍爲後勁  
由北路迎擊羅澤南列陣南路防賊抄尾鳳山初交鋒賊卽佯  
敗追至數里之遙伏賊突起蜂擁而來我軍稍却塔齊布後隊  
踵至匹馬衝截各勇回戈向敵賊遂大潰羅澤南聞北路前隊  
小郤急由山腰橫截而北正值賊衆大敗之時會追至二十餘  
里陳玉成恐衆胥遁次日收復縣城 是月將軍托明阿由揚  
州遣軍會向榮軍克浦口 十一月初一日塔齊布羅澤南破

賊於雙城驛 初四日塔齊布羅澤南克黃梅縣時秦日綱陳玉成羅大綱皆集黃梅於北門外列賊營三座萃萬人其中塔齊布率李續賓先逼賊柵羅澤南率蔣益澧隨進彭三元普承堯從西面越二牆而來時魁玉楊昌泗亦由大河埔接應賊見火起由營壘潰出墮入陷坑者二千餘人我軍乘勝攻城羣賊東遁遂收復縣城

上諭楊霈奏克復廣濟黃梅一摺所敘進攻九江情形似該郡賊黨尙復不少塔齊布渡江而北南岸官軍卽不能得手是江西陸路兵勇殊不足恃塔齊布仍須渡回南岸倘南北兩岸專恃一塔齊布奔馳追剿則湖北江西兩省官兵豈不皆成虛設

耶時公軍水師駐泊九江僞丞相何潮元羅瓊樹僞指揮賴桂英等分守九江湖口而僞翼王石達開方踞安慶相犄角李孟羣彭玉麟苦戰兩次賊燄未衰南北兩岸賊營環列水陸依護抗拒甚力我師與陸軍隔絕孤懸大江介處賊營之中晝夜戒嚴公疏言臣等細察近日剿辦情形有可恃者數端而可慮者亦有數端凡覘軍事之勝敗先視民心之從違前此官軍有驕擾之名賊匪有要結之術百姓不甚怨賊不甚懼賊且有甘心從逆者自今年以來賊匪往來日密搶劫日甚升米尺布掠掠罄盡焚燬屋廬擊碎釜缶百姓無論貧富恨之刺骨其自遭家難旣有創深痛鉅之情其追溯

皇恩遂有浹髓淪肌之感臣等一軍所到之處民間焚香頂祝  
夾道歡迎紮營之地或送薪米或送豬羊蓄髮之民願爲偵探  
願爲向導賊匪雖嚴刑禁殺百姓不甚畏忌猶殷殷輸誠於官  
軍我

國家深仁厚澤二百餘年不當此大亂之後不知感人之深一  
至於此臣等適逢其會而食其報而今年兩湖三江又皆年穀  
順成豐收三倍萬民樂業翹首望治視往年官兵過境無物可  
供買辦無人可爲向導者氣象爲之大變此民心之可恃者一  
也此軍初起銅項支納幾有朝不謀夕之慮自蒙我

皇上殷勤垂念

飭令湖南供支又

飭諭四川廣東協濟又

飭江西陝西籌解鉅欵又頒發部監各照臣等所請者仰邀聖慈俞允臣等所不及請者亦蒙

特旨飭催今湖南江西捐項日形虧蹟陝西已解到六萬四川又續報三萬前此之餉無欠贏月之項有著軍士有飽騰之象臣等鮮意外之虞此飭需之可恃者一也軍興以來多以意見不合將卒不和貽誤事機臣等一軍勇逾萬餘兵僅數百其管帶之員文職多擇取士紳武職多拔取末弁有夙昔之恩誼無軍營之氣習不特臣國藩臣塔齊布一人親如兄弟合如膠漆

卽在事人員亦且文與武和水與陸和兵與勇和將與卒和糧台官紳與行間偏裨均無不和全軍二萬人幾如家人骨肉之聯爲一體而無纖芥嫌隙之生於其間此臣等秉承

聖訓和衷共濟亦可恃之一端也江西水師本可借以協助臣軍頃據德化縣知縣稟報自前月二十八日孤塘失利退駐吳城該匪水陸來撲江西省戰船四十餘號盡被搶奪旛幟砲械皆爲所有等情又據探報該逆在安徽仿照我軍船式新造戰船三十餘號意圖西上拒禦官軍等情該逆前次屢以民船致敗自至九江專用小划夾護戰船緊貼岸營臣等方反復籌思不得所以破之之法今又益以江西搶去之船與安徽新造之船

賊縱益增其氣益熾若使屯踞湖口梗塞於鞋山孤塘之間內窺江西外拒我軍地形險隘勢難遽下我軍與江西咫尺隔絕不能相通其可慮者一也陸路賊黨北岸固多而南岸亦復不少屢據稟報九江府城之賊出撲總兵居隆阿營盤湖口之賊分竄饒州臣等陸軍單薄在南則不能顧北岸渡北則不能顧南岸卽欲渡江亦須繞至上游迂迴百餘里三四日乃能渡畢而該逆愈剿愈多愈擊愈悍我師皆長征之卒無生力之軍轉戰千里筋骨勞困若更往來頻渡卽令全不挫衄亦恐疲於奔命鉛磨銳氣其可慮者二也軍事以練將爲最要臣等一軍皆選湘勇本乏將弁苟有翹出之材臣等不惜破格超保儲爲將

領乃甄擇已久求其獨當一面者殊難其選求其雖遇敗挫仍能揩拭者尤難其選今水師營中楊載福以積勞致病何越珽以受傷出營陸路諸將亦皆更多謀少設一遇敗挫無曉事之將領以揩拭之則恐潰敗而無以自立此又臣等隱以爲慮之一端也目今之計惟有力攻孔隴驛小池口之城紮營江岸使水師得所依護待督臣楊需率師至黃梅後北路足資堵禦然後臣塔齊布與羅澤南全師渡江以圖攻克潯郡步步謹慎不敢稍失疏虞以期仰副

聖上委任之意 初七日羅澤南敗賊於灌港 十二日塔齊

布羅澤南破賊於孔隴驛復捷於小池口 十四日李子血羣彭

王麟率水師破賊於小池口盡燬洲上賊營及船簰幾盡潯陽江面肅清十五日公進駐九江彭玉麟擊賊於小池口塔齊布率師南渡會攻破之燬龍開河木城一座水師乘勝進焚湖口公疏言湖北臬司胡林翼識略冠時調令來潯助剿副將王國才都司畢金科馭軍有法請歸調遣奉

旨報可胡林翼兵至九江十六日李孟羣敗賊於湖口

十八日李孟羣水師復捷於湖口二十日賊乘黑夜犯水師營李孟羣彭玉麟蕭捷三擊破之焚賊船百餘號二十一日羅澤南由白水南渡賊乘我軍未定悉銳來犯澤南部將李續賓蔣益澧蔣昌梧擊退之追至九華門外蔣昌梧燬城外賊壘

二座 二十七日水師連捷於湖口 是月安徽巡撫福濟克  
舍山縣 十二月初一日公親督軍攻九江城未克九江城北  
枕大江東北有老鶴塘白水港西南有甘棠湖西有龍開河獨  
東南多山爲大姑塘入城要路公先遣塔齊布胡林翼攻西門  
逼近賊壘守賊何潮元等以大礮數十轟擊我軍殊死戰三進  
三郤相持四時而退乃定四面合攻之策塔齊布攻西門羅澤  
南攻東門胡林翼攻南門王國才由舟登岸從九華門掩入賊  
濠寬三丈外樹木柵礙如飛蝗我軍仰攻受傷者甚衆參將童  
添雲攀堞而登被敵擊破胸腔昇回營中而殞我軍傷亡二百  
餘人 初六日九江城賊犯官軍營恆泰擊却之 胡林翼羅

澤南破賊於梅家洲彭玉麟大捷於湖口時僞丞相羅大綱踞  
梅家洲僞翼王石達開踞湖口縣用大小木簰分扼湖口東西  
岸各築城堡布置極嚴胡林翼攻梅家洲東李續賓攻洲西羅  
澤南攻中路洲中之賊亦分三路迎拒另股撲我廬山大營之  
後蔣益澧自執大旗向前抵禦李續賓短兵殺山後之賊大  
敗洲上之賊懼不敢進斃賊四百餘名彭玉麟率水師攻木簰  
破中藥箱響若山頽須臾簰盡賊自投烈焰而死或沒水由他  
處鳧出生擒僞將軍梁國安僞總制熊長易僞司馬許學受僞  
總制熊廷詔陳經綸初七日賊犯王國才營我軍擊郤之  
初十日胡林翼羅澤南擊賊於梅家洲敗績彭玉麟率水師會

攻焚賊船三百餘號 十二日蕭捷三段瑩器孫昌國率水師  
三百餘駛入鄱陽湖追賊至大姑塘賊窺我軍小船衝入內河  
築壘斷其後路使與外江隔絕突岀賊划二十餘隻圍我快蟹  
大船都司史久立死之夜三鼓賊復用小划攢入老營燒我船四  
隻兩岸火箭噴筒迷離施放我軍無小船不能禦焚我戰船四十  
餘號而梅家洲賊亦乘夜撲營胡林翼羅澤南擊卻之 二  
十一日湖口之賊北渡小池口公檄胡林翼羅澤南由湖口同  
剿九江 二十四日湖廣總督楊霈擊賊於廣濟敗績 二十  
五日賊以小艇夜襲我營公座船陷於賊文卷皆失公自投於  
水左右救之急掉小舟馳入羅澤南營以免公欲以身殉國草

遣疏千餘言羅澤南力諫乃止因上疏自効

上諭水師銳氣過甚由湖口駛至姑塘以上長龍舢舨各船與外江師船隔絕以致逆氛頓熾兩次被賊襲營辦理未爲得手曾國藩自出岳州以後與塔齊布等協力同心掃除羣醜此時偶有小挫尙與大局無損曾國藩自請嚴議之處著加恩寬免

二十六日賊竄武穴李孟羣水師追擊敗之賊沿江上竄

二十七日蕭捷三等水師大捷於都昌捷三等自駛入內湖十三日破賊於平鳳十九日至吳城鎮聞都昌有賊連日駛至都昌見逆船排於河面大小數百號黃旛飄拂賊不意我軍猝至倉皇失措各營蜂擁而前鎗礮齊施值東南風發火光貫日須

史賊船皆盡撲水死者不計其數生擒五十餘名賊奔入縣城  
水師還過雞公湖復燬賊船三百餘號 二十九日塔齊布李  
續賓將益澧自九江北渡戰於小池口敗績

求闕齋弟子記卷四